

訓約

一 尊敬宗祖

祖功宗德百世難忘音容雖邈誠敬可將後人培植
前愈增光水源木本謹奉蒸嘗

講語 祖宗者吾家之所由起也當其創興立業
以來或傳至數百世或傳至千百年想其積德
累功不知幾經艱難締造以有今日無非詒謀
於子孫欲其世世守之弗替也子孫賢者或習
詩書則思先人之教澤未泯或勤隴畝則思先
人之置產殊難今日祖宗雖往我等虔奉祭祀

則一念之誠敬固可感格而不忘其本乃可仰對祖宗而無愧也卽祖宗無甚功德猶思自我栽培以爲光前裕後之計况前徽赫濯而可白墜家聲乎每見不肖者廢讀懶耕以敗家失業不謂自貽祖宗羞辱反致怨祖宗不強如此之人實爲敗類通族所宜擯斥

一孝順父母

父天母地養育恩深教娶衣食幾歷辛勤罔極難報孝順是遵承歡膝下菽水亦馨

講語 父母者吾身之所由生也當其乳哺懷抱

之時劬勞固難盡述及至成人或教之讀或教之耕夙夜不遑自逸旣娶之室復立之家絲枲罔不經心屬毛離裏之恩雖隕首亦難上報但爲孝子者家苟豐厚雖甘旨不缺於供輕暖常護其體尤當內極其敬外致其和以盡吾順事之禮家卽貧寒雖布衣蔬食尙能先意承顏不逆其志不勞其形亦可得其歡心而全吾至性况保身卽以事親上之立身行道固可顯親揚名次之服賈力田亦可全歸無憾至若終天抱痛尤當盡禮盡哀每見不肖者在家則忤逆爭

競辱詈交加在外則好勇鬪狠以危父母甚或私其妻子不顧父母衣食如此之人天理王法在所必誅

一友愛兄弟

惟兄與弟同氣連枝兄以愛往弟以敬施詩歌棠棣樂奏壘簾急難禦侮和樂可思

講語 兄弟者分形連氣之人也比之手足比之雁行以其痛癢相關舉動不離也古人有大被同眠灼艾分痛者無非篤友恭之誼惟是兄愛其弟弟敬其兄勿以小忿而生忌刻勿因財利

而起爭端居常則協力維持有變則同心禦侮
庶家和而福自生矣語云兄弟不和鄰里欺何
苦自留瑕隙而受他人指摘也况兄弟同屬父
母所生愛敬兄弟卽所以愛敬父母兄弟既翕
父母有不安樂者乎每見不肖者多爲婦言所
惑以致競短爭長見利忘義分門割戶患若賊
讐骨肉參商幾如陌路如此之人宜爲宗族鄉
黨所不齒

一和順夫婦

乾剛坤柔配合一定偶以夫妻內外相應夫和

而義妻柔而正琴瑟既調家聲自振

講語 夫者扶也所以扶持家道者也婦者服也

所以服事於夫者也陰陽和而後雨澤降夫婦和而後家道成閨門萬化之原未有夫婦不和而家道能成者故夫不可不敬其婦婦不可不敬其夫夫妻相敬如賓此翼缺之所以見知於白季也易首咸恆書美釐降詩咏關雎禮重親迎凡以夫婦爲人倫之始所以上承宗祧爰及苗裔者也是以男正乎外不可偏聽私言女正乎內不可干與外事然後乾剛坤柔各得其所

和氣日集家道日隆倡隨之義不綦重乎每見
愚夫愚婦不知大義所重或不克自振而有牝
鷄之晨或釀成禍端而致反目之誚人倫之始
旣乖萬事因之瓦裂可毋戒歟

一教訓子孫

惟子若孫義方是訓嚴師益友端蒙養正忠厚傳家
立品操行勤儉治生安貧守分

講語 子孫者承先繼後之人也父兄之教不先
則子弟之率不謹古者尙有胎教况由童穉以
至成人而可無以教之乎當其幼也卽教之以

子弟之禮孝親敬長愛眾親仁執事有恪言語
必信毋長驕傲毋事慢遊擇嚴師以訓詩書益
友以資講習賢父兄督之於內嚴師友輔之於
外未有不底於成者幸而名成業就固可光大
門閭卽不幸而屈抑蓬廬亦不失爲明理篤行
之士若其家寒不能肄業且或資鈍不能加功
卽當教以務本力農學莫先於治生桑麻滿野
衣食充盈亦屬人生快事何必不如人乎但宜
節儉毋尙浮華可也若中棄不中才棄不才家
法不嚴誥誡無術或任其怠惰廢業或聽其狎

比匪人或酗酒淫佚或賭博嬉遊如此之類皆由不教所致則人亦何樂有賢父兄乎

一和睦宗族

同宗共祖一脈所分親疏雖別情誼則均無構仇隙弗事欺凌扶危濟困合族同心

講語 宗族者吾祖宗所分之支派也自我觀之固有親疏遠近之別自祖宗視之則均是子孫非若他人之不相關切也其在父兄輩則在我有子弟之職其在子姪輩則在我有父兄之分相接以禮相遇以恩弗以細故而懷仇憾之心

勿乘危困而有樂禍之心勿以彼之富貴而生
嫉忌之心勿以彼之貧窶而起厭薄之心居常
則時相聚會有事則共爲扶持如此則一家和
樂意洽情投祖宗顧之樂可知也每見忤逆之
徒不之一本九族之義以強凌弱以眾暴寡以
富欺貧以智詐愚或因田土而構訟成讐或因
財利而爭鬪不已其得罪祖宗不已甚乎族中
有此亦宜責罰

一 賙恤孤貧

孤寡貧寒理宜矜恤矧在同宗心愈滋戚保護提攜

俾之成立酌盈濟虛析肥補瘠

講語 族中之孤兒寡婦此天倫之缺陷尤人生之苦境也在外人視之猶加憐憫况同宗共族之人安忍坐視倘有孤子孤女貧不能嫁娶者當諒助之卽殷實之家亦必爲之調劑扶持庶可免於破敗不受他人欺侮且婦人之性尤易動搖彼不幸而失所天爲尊長者當令內人委曲喻以節義之重更不幸而無子且宜擇昭穆相當者以繼之慎毋覲其所有而逼之改醮惟有極無所靠且年幼而無所歸者度其萬難苦

守乃可擇配以全之至若族中之貧乏不能自
存者尤宜時加賑貸我則膏粱文繡彼則藜藿
難飽裋褐不完於心安乎昔晏子彰君之賜榮
及三族范文正公置義田以待族人古人之高
誼諒可慕也苟漠不相關視猶秦越亦何樂有
宗族乎

一畜養僕婢

內外尊卑體統所係太寬則驕過嚴斯忌力役須均
衣食必遂惟慈以畜惟莊以蒞

講語 奴僕者服役於我之人也從來人家奴僕

實力忠心於主者能有幾人蓋羞惡之心人所同有彼豈獨甘心爲人役乎但能善爲調養自可得其力而固其心思彼亦猶人子我旣爲之主則所倚賴者惟我使當加意體恤毋得闕其衣食毋得過爲勞苦彼旣無凍餒之害又得寬其手足自如嬰兒之伴慈母何至有悖叛之事至少有過犯則呼之至前先以好語警戒彼或不悛則略加斥責以示威嚴慎勿暴怒頻加鞭箠不已使彼無容身之地以生其忿恨之心尙有一種豪奴悍婢難以馴服者則不如遣之使

去母結怨於彼是亦保全身家之一道也更有
一種狡僮俊僕尤須善爲防閑毋使出入閨門
免生他事其有婢女年長無配者當爲擇人而
遣嫁之且量得財禮是亦忠厚存心之一道也
則彼之父母自心悅而誠服矣

一嚴正家法

家法之嚴次於國律妬忌者懲強悍者抑執理秉公
爭競自息族正房長不時儆惕

講語 族正者族中之正人也房長者一房之尊
長也吾族姓繁衍各居一方族正房長隨其地

而立之但其人須立心制行可爲模楷如遇房內之人有雀角之嫌該房長卽要秉公毋圖小利毋挾私忿毋恃尊貴毋畏凶橫依理剖斷剖斷得公尤有強梗不服聽該房長傳集別地族正房長公論允協卽於祠堂責罰倘仍逞刁告狀該各族長齊赴縣轅直呈請懲其中有圖利徇私斷事不公合族公議改斷並將偏斷之族正房長戒飭外另行選立從此無黨無偏有賞有罰讀族譜如讀爰書逢家人如逢老吏慎之慎之仰副 國家刑期無刑之至意

一定派昭倫

實行之敦首重明倫小不加大卑不踰尊定其派序
後裔挨循周而復續字共源清

講語 派字者定尊卑之分也尊卑定則昭穆分
其或尊者少而卑者長不可紊也卑者貴而尊
者賤不可踰也卑者智而尊者愚不可欺也而
總於此派字驚心焉遵此字派雖地有遠近世
有先後不得以秦越相視庶幾不失我祖宗一
脈流傳之意殆亦如嶓嶭積石諸水發源歸宿
罔不向宗也乎